

鍛鐵當用椎析薪當用斧拔蓼而植荼
去辛還得苦峨峨九陽門衛以豹
與虎微微螻蟻忱鬱鬱不得吐

登卧龍山寫懷二十八韻

暮春時雨餘原野皆秀色流雲暖芳甸
惠風暢輕翼公館倦低垂崇岡緬
登陟山川糾紛錯疆畎互紆直淒涼神
禹穴偪仄句踐國玉簡閱玄緘銅
牛啓雄德霸氣浩江河王風散荆棘感
今情軫鬱懷古心愴惻東溟尚波
濤中原未耕織無能事蕭曹妄意追契
稷蹇產魂屢遷逶遲足猶側良辰
復幾何白日忽中昃周流睨圓方俯仰
觀動植有水必趨東無星不拱北
宗社固神靈至尊實恭默殷王伐鬼方
尙期三年克苗頑負險阻終竟膺
竄殛天戈向無前况乃誅鬼蜮竊聞海
濱民決背疾狂慝荷受思一奮所
懼官未識朝廷鑒往轍中自誅貪懷主
將敦書詩志士願盡力諸公總英
俊矯矯百夫特愚生諒疎拙千慮與一
得農人奉壺漿遲爾殄蝨賊采薇
戒懷歸伐檀慙素食白雲在青天可望
不可卽浩歌梁甫吟憂來憑胸臆

贈柯遂卿首并序

今年夏四月余至台聞柯遂卿抗言釋誣囚事甚異而偉之夫天下之大